

le mude regolate, e non zostrarà el viazo di Damasco con Alexandria, nè i magazeni pieni con li vodi; *tamen* per lui faria le venisse presto; *tamen* con-
 95* seia il ben di la terra. Et lui fin quel tempo, dize, starà con spesa, perchè non vien nave al viazo; e quando le venisse, una nave li daria 10, over 15 ducati; e le galie venga quando le vol, l'è dil suo successor. *Etiam* è una raxon, le spezie è a Venecia sta molto care, in questo mezo le smalteriano; et altre raxon etc.

Et stando in aspetazion di la venuta dil signor Soldan, l'aparse a di ultimo Decembrio fuora di la terra. A di primo, la matina, intrò con caschi 500 armadi et armiragi 30, altri che l'acompagnava fin a la summa di cavalli 2000; alozò sul porto vechio fuora di la terra. In quel zorno andai a farli riverenza, dove che, essendo so' signoria a riposar, differi alquanto nel pavion dil memendar, dove ne era *etiam* el turziman grandò, el consolo di catelani, e fo tratado molte cose, e la causa di la ruina di la terra, tolendo el so mezo de farne dar un zorno per uno audienza secreta; et cussi ne promesse. A la sera, andasemo a saludar el signor Soldan, dove che io vulsi *immediate* salutarlo con parole de salutazion, et mi dimandò perchè causa non venia ni nave, ni galie. Rispusi che sua signoria si volesse degnar darme una audientia secreta, li dirò il tutto et altre cose che li serà grate. Rispose: « Doman la matina ». El no fo modo, perchè sua signoria tornò con i pavioni indriedo ad alozar per contro del Farion per voler tornar al Caiero, *cum sit* che li era zonto letere del so' campo d'Alepo era levato e tornava per esser avanti lori al Caiero. El terzo zorno me n'andai fuora et trovai *etiam* el consolo di catelani, non era quel di zenoexi per esser amalato; et fizi intender al signor Soldan desiderava dirli alcune parole avanti la sua partita; mi feze chiamar inanti el so pavion presente. *Etiam* vene el consolo di catelani; el qual per non n'aver parlato a la prima salutazion, quando el vene, volse prinzipiar a parlar per i fati soi, et subito el signor Soldan li feze un rebuffo e disse: « Lasa parlar el consolo de' venetiani, che mi à dimandà audienza ». Subito io intrai in le cose necessarie per ridrezo di questo viazo, e li disordeni, alegando i tempi pasadi de' altri Soldani, mostrandoli comandamenti vechii a nostro proposito. Volse veder i comandamenti e capitoli feze el clarissimo missier Domenego Trivixan, leti a uno
 96 a uno. In quelli non vi era oservati, acuxava al Cosa ivi l'interrompeva; a quelli non è a nostro proposito, mi doleva et asegnava raxon non esser conve-

niente i stesse per ridrezo del viazo, *ita* che la udiencia fo da poco, poi mezo zorno fin 24 hore pasade. Richiexi molte cose. Ultimo loco mi concesse 15 capitoli per questa terra, che sarà de grandissima utilità a la nazione, et per le cose de Damiatia 8, i quali mando qui inclusi traduti *de verbo ad verbum*. El consolo de' catelani era presente et mai parlò; *solum* al partir una parola. Io stiti tuta quella note in campo fino fizi compir i mei comandamenti, che sua signoria montò a cavallo, ch'era l'alba del zorno. Nel partir, lasò in zima el consolo de' catelani et el Coza; el qual consolo pagò da poi 13 milia ducati ch'el dovea dar per non andar. El Coza andò; non so quello sarà la so' fin, perchè ò ditto tanto mal de lui, et era ben intexo, che credo non sarà senza esser pelado. À ordinato di qui far un farion sul porto vechio, un altro sul porto novo a l'incontro del farion, ma piú propinquo a la terra di quello è l'altro; *etiam* una torre granda a la caixa de l'armiragio per meter dentro el Soldan, e l'armiragio grandò xe qui in prexon. Al qual signor Soldan non ho voluto apresentar niente, perchè el tempo non porta, *maxime* che haria bisognà come ad altri Soldani, ducati 5000 con la corte; sichè bisogna liberar non agravar sto cotimo. Fui rizercato dal turziman Coza e Nadraches se volea esser vestido, perchè el signor Soldan volea per haver portà la vesta; io non vulsi, perchè saria stà nezesario spender per non agravar il cotimo, benchè da alcuni era consià altramente. Dio volesse ditto signor Soldan fosse stà qui 8 zorni pi. Sperava, mediante la bontà divina, far bon frutto a la nazione, perchè con questi bisogna piú presto pratica che tanta sapienzia, perchè bisogna farli intender senza rispetto. Zonse al Caiero il signor Soldan in zorni 8. Al suo zonzer, i mamaluchi cavalcò; s'el volse intrar in castello, el promesse la zemidia a li zilebi ducati 100, a li cornas ducati 50 per uno, la mità al presente, l'altra mità al ritorno di la caravana di la Meca, con la qual xè so fio e so mojer; l'è messo in zeca i soi arzenti, credo, per monstrar non
 96* aver danari. Scrive sopra il cotimo di Damiatia non è pagato etc. Per aver il Signor e cadi di quel loco, bisogna far provisione di qui a Venetia. Ho ricevuto letere dal Cajaro. Come el signor Soldan ave la mia letera, e leta subito, dimandò dil fanò, e subito li fo portato e volse fusse posto in ordine in sua presentia su la staza, e ave grandissimo apiazer, e ordinò fose meso per la so' corte e non per l'armada; li è stà molto caro. E dise a Benezian: « Tuo' la caixa del consolo e fa quanto el vol; » per la qual li richie-